



Cuira, 6 da schaner 2025

Communicaziun a las medias

Start da la Dretgira superiura è gartegià

La Dretgira chantunala e la Dretgira administrativa èn vegnidas manadas ensemen tar la Dretgira superiura dal chantun Grischun. L'entschatta da l'onn ha la nova dretgira prendì si la giurisdicziun – per il mument anc en dus lieus.

Igl è in mument decisiv per la giustia en il chantun Grischun. Cun la fusiun da la Dretgira chantunala e la Dretgira administrativa l'entschatta dal 2025 è vegnida stgaffida la Dretgira superiura. La fusiun da las duas dretgiras superiuras è l'element essenzial da la refurma da la giustia 3 che las votantas ed ils votants dal Grischun han approvà la fin november 2022. Suentar var dus onns lavur da project èn vegnidas creadas novas structures, schibain en il sector da la giurisdicziun sco era en l'administraziun giudiziala.

Il start da la Dretgira superiura è reussì: La dretgira cun rodund 50 collavuraturas e collavuratur ha prendì si la giurisdicziun l'entschatta da quest onn. President da la Dretgira superiura è Remo Cavegn ch'era enfin qua president da la Dretgira chantunala. Vicepresident è Thomas Audétat, l'anteriur president da la Dretgira administrativa. La Dretgira superiura è l'istanza giudiziala suprema dal chantun en chaussas civilas e penals sco era per dispitas administrativas, costituziunalas e dispitas pertutgant l'assicuranza sociala.

En in'emprima fasa vegn il manaschi da la Dretgira superiura a cuntinuar en ils dus lieus d'enfin qua en la Obere Plessurstrasse 1 sco era en la Poststrasse 14 a Cuira. Previsiblamain envers la fin da l'onn succeda lura la midada da chasa en il nov sez da la dretgira en la Grabenstrasse. Là vegn l'edifiz statal, construì ils onns 1877/1878, actualmain renovà tenor criteris da la tgira da monuments sco era extendì cun in bajetg supplementar.

Nov post da stab per las dretgiras regiunalas

Era tar las endisch dretgiras regiunalas en il chantun Grischun hai dà midadas l'entschatta da l'onn 2025: Las dretgiras regiunalas han relaschà lur agens urdens da gestiun. Ultra da quai vegnan ellas sustegnidas e cussegladas el futur d'in post da stab, creà danov per las dretgiras regiunalas. Sco responsabel per il post da stab è vegnì elegì il giurist Jim Rogantini. A sustegnair vegn Rogantini las dretgiras regiunalas schibain cun la surveglianza sur ils uffizis da mediaziun e las autoritads da mediaziun concernent la locaziun sco era cun incumbensas



Obergericht des Kantons Graubünden
Dretgira superiura dal chantun Grischun
Tribunale d'appello del Cantone dei Grigioni

pertutgant l'administraziun giudiziala. Al nov post da stab vegnan ultra da quai attribuidas incumbensas pertutgant la protecziun da datas, il perfecziunament sco era la collavuraziun tar projects sco Justitia 4.0 (digitalisaziun da la giusta svizra).

Contact per ulteriurs scleriments:

Remo Cavegn, president da la Dretgira superiura

Telefon: 081 257 39 68

E-Mail: medien.og@gr.ch